

嘉靖江陰縣志

外傳第十四

江陰縣志卷之二十

方伎

郭璞字景純本河東聞喜人也博學有高才妙於陰陽筭曆有郭公者客居河東精於卜筮璞從之受業公以青囊中書九卷與之由是遂洞五行天文卜筮之術通致無方雖京房管輅不能過也當惠懷之際河東先擾璞避地東南因寓于此卜葬其母詳見晉書本傳

杏林叟姓董匿其名隱居暨陽山中或云吳神醫奉之後也嘗遇異人授鍼術砭刺按摩攣舒鬱通求療踵至不責其報第令舍傍種杏一樹久而成林嘗曳杖樹下歌曰杏之華其下我家杏之實其美我食吾寧舍是子而從人于役

是巨淵嘗遊吳遇異僧指地上草繇是治法通神有一男子吻舌流血不止巨淵望見急趨數里向東壁拾螺殼一枚指其患處投之即愈又有一女子欠伸兩臂向上不能俯巨淵至令着單衣直立至則急褫其裙雙手即下蘇州富家子病大熱群

醫不能療巨淵鑿地爲坎令曳病者卧其上以泥水沃之湏臾而愈或問之故巨淵曰此子多寵妾中麝香毒也其他治效類是不能殫舉

林愔號中菴少業醫讀書明理治法多主丹溪城中子弟學爲醫者盡出其間人稱有德必曰中菴先生

何澄號竹鶴老人出處見鄉舉善畫宗高房山家法氣韻蒼古筆勢清高乘興戲作梧竹蒲石森秀可愛今其雲山小景東南人家多有之子孫亦有

摸擬之者

瞿杲字炳暘本五衢人隱居江陰之龜山性嗜酒喜跌宕畫花鳥有名蘆鴈入高品自號醉漁

僧曇素廣福寺西廡藏殿後壁有嘉祐間惠天師曇素畫梁武帝召張僧繇寫志公變相圖筆力遒健神氣欲生見者驚悚

僧道松觀音大士木塔下有草書心經滿壁筆力遒健末題云孟冬月比丘道松書不記年歲莫詳何代人近歲侍郎耿公命工摹刻于石嵌於左廡

之壁或傳乃李唐僧云

僧象微景祐初廣福寺法堂楣間畫水一派甚工
號象微水

僊釋

許遜字敬之本汝南人宅在青暘鄉按爲善陰隲
傳晉武帝大康元年爲蜀旌陽令民困租負遜點
石化黃金潛瘞後圃中俾民鋤圃得金以償屬歲
大疫死者十七八符呪所及無不立愈旣而棄官
東遊從丹陽黃堂靖女仙謚母授正一斬邪之法

三五飛步之術過西安有神迎告曰此有蛟物害
民知僊君來往避鄂渚願早除害遜聞追而欲斬
之海昏上遼有巨虵據山爲穴吐氣成雲人畜在
氣中者卽被吸吞遜前至其地虵出穴吐毒衝天
遜嘯呼風雷命弟子吳猛施岑甘戰飛步引劍屠
之至豫章告衆曰巨蟒旣誅蛟精尚未滅行遊鄜
邑遇一少年自稱姓慎容貌豐偉應對捷給遽爾
告去遜曰此老蛟也醒風滿體跡其所之乃化黃
牛卧江澣卽剪紙化爲黑牛往鬪之令施岑持劍

俟其鬪酣一揮中其左股奔入城南井中出長沙
仍化爲人贅于賈玉家遜往至其家屬聲叱曰江
湖蛟精乃爾蛟不能隱乃見本形蜿蜒堂下以水
噴其二子皆爲小蛟併誅之賈女形亦幾變給以
靈符得免復謂玉曰蛟所居多水君亟遷舍玉如
其言徙高原其地陷爲深淵蛟之餘黨變恠授劍
於岑使履水斬之水妖絕迹城邑無虞孝武寧康
二年甲戌年一百三十六歲八月朔旦昇仙甚異
狗腿和尚徐姓逸其名住太清寺人常見其嗜犬
肉因便呼之有縣人建大齋普延僧衆和尚赴之
齋畢索盥睡於水皆成金魚追索之不復見
僧復法師紹興間住迎福院書華嚴經畢擲筆池中
化爲青蓮花

